



15 ME 2023 ~ Lomiga 6 ~ Upega Tafailagi: www.ola888.com ~ Telefoni: 0210364322 ~ Tuatusi: ola.niupac@gmail.com ~ evaleon.books@gmail.com ~ NIUPAC Publication

Faamavae atu aiga ma uo ia Karnin Ahorangi Petera



Ua logo itu e fa o Aotearoa, tainane foi le lalolagi i le faalavelave na maumau ai le ola o se tama a'oga, 15, i Niu Sila.

O Karnin Ahorangi Petera (ata), o se tama a'oga a Whangarei Boys High, i le itumalo i matu, Northland, na tafea i au o timuga i totonu o se ana, ma maluu ai.

Tainane le mau faailoilo ma lapata'iga, e le tatau ai ona ulufale, peita'i na lei taofia ai i latou sa ta'ita'ia le asiasiga. O i latou nei o loo ua pito i luga i le su'esu'ega a leoleo, ma e ono molia nisi i le fasioti tagata ui e lei faamoemoeina ae i le faatamala. Ua ta'u foi le ono molia o le a'oga ma lona pulega i lenei lape tulaga ese i faiga faaiuga.

O le ela o le matega e muamua i le taimi o le asiasiga. O le fesili a nusipepa ma le afaasalalau, pe faapefea ona pasia e le fono faatonu se malaga e alu i se vaitau aupito leaga i le tala o Niu Sila.

E oo lava i le taimi o le asiasiga, sa manino lapata'iga mai le vaaitau i le tulaga faaletonu o le tau, peita'i e lei utagia lava.

O le mea lea e tulaga ese ai lenei malaia, talu ai sa manino lapata'iga, ae e lei amana'ia e i latou e faia tonu, pe faapea foi e leai se isi na manatu mamafa i ai.

Lea ua sauni atu le pulega e tali i le faamasinoga i se taimi lata mai.



MANUIA LE ASO O TINA 2023: Ona o oe, ou te ofoina atu ai le taeao e fai mau taumafataga; ona o oe ou te avatua ai ma oe fua o lo'u togala'au.' O upu o se solo e molia le lagona o le to'atele i o latou tina. Tele tina alofagia i meaalofo ma se upu faafetai, tele foi tina e le faapena. Tele tina o loo soifua sa'oloto ma fiafia, tele foi tina o loo fesaga'i ma lu'itau ogaoga o le ola. Tatou te patipatia i latou uma i lenei aso faapitoa mo i latou.

Taumanuia sailiga Tofilau Dr Siliva



Tofilau Niulevaea Dr Siliva Gaugatao ma le faletua i le aso o le faau'uga

I le faau'uga a le lunivesite a Aukilani talu ai, na faae'e atu ai mamalu o le tulaga foma'i tofa manino i le alii faia'oga ia Tofilau Niulevaea Dr Siliva Gaugatao.

O le afiga ia Tofilau o se faigaluega a le lunivesite o Aukilani i le lagolagoina o faia'oga o loo faipa'aga ma le a'oga i ana poroketi. E tele ni tausaga o galue ai e aulia mai le aso.

O lana galuega sa togia ai o lena i le sao o tamā poo tane i le lagolagoina o a'oga a le fanau i le tapulaa maua (kolisi).

O se galuega muamua ua avatu ai le taula'iga o le su'esu'ega i le na o tamā poo tane o loo tausia fanau i aiga. O isi su'esu'ega e aga'i i matua uma o le tamā ma le tina.

O le fesili sa fia iloa se tali manino e le alii su'esu'e, pe mafua i se a le le auai o tamā i le tiute tauave o le faa'o'ogaina o fanau. Ua avea ma masani le faia o lea tiute e tina. I Niu Sila nei e le faigata ona iloa i afiafi e feiloai ai matua ma faia'oga, to'atele o tama e le auai i nei feiloa'iga taua.

Talu ai le tulaga faaleiloga o ausiga a fanau, o lea foi ua avea ma se tupua taumate i le alii su'esu'e, le ono iai o se faia ma lenei musua o tamā e auai.

I lana su'esu'ega o loo faamatalatala ai le vao mafua'aga i lenei tutu mamao o tamā, e ono tuua'ia a'oga, ae manatu foi isi, o le sao o le tamā e auala i le tausiga o le aiga i mana'oga masani.

O iai foi tamā e fiafia e auai ina ua iloa le taua o sea faatinoga. E te maua se atoaga o lana finauga i luga o le tatou Upega Tafailagi www.ola888.com.

I le tofiga o loo galue ai nei, e tele ni galuega faapa'aga ma a'oga sa aafia ai, i le faamaopoopoina o taiala ma faamatalaga mo gagana a le Pasefika e lagolago ai faia'oga.

Ese mai ona tiute faalegaluega, o ia foi o le ta'ita'ifono o le Fotu o Malama, faalapopotoga o faia'oga Samoa o loo galulue i kolisi ma iunivesite. O se tiakono foi o lana ekalesia i Aukilani ma se faipese, tautua ai ma lona faletua ma le nofoalo.

TALA A'OGA NIU SILA: SAILI AUKUSO

O la ta gagana o lo ta tofi mai le Atua: feiloa'iga Te Waka Unua



O le Aso Faraile 12 o Me i le aoauli o se aso fiafia lea i tamaiti o le Tava'e Vasega Samoa i le A'oga a Te Waka Unua Woolston i le aai i Karaiesetete.

O le ulua'i mafutaga lea ma nai o latou matua, ma o latou matua matutua, e molimauina a latou galuega ua amatalia nei i totonu o la latou vasega.

Mo le silafia a le aufaitau, o lenei vasega fou o se taulagalaga fou a le a'oga ua ta'ua, o se vasega ua avea i ai le ta'u 'vasega Samoa.'

O faamoemoega o lenei taulagalaga e afua mai i matua lava ia, i lo latou naunau e faavae se a'oga e a'oa'o ai fanau e ala i le gagana Samoa. Sa tausolomua fo'i le tama'ita'i pule ma se tasi o matua, le susuga ia Jason Tiatia, o se tasi i le fono faatonu a le a'oga.

Sa amata lava i le lotu pepese fiafia ai nai tamaiti. O le sa fa'atautaia le polokalame o le susuga ia Jason Tiatia. Saunoa foi le tama'ita'i faia'oga ia Ruta McKenzie i le fa'alauiloaina o le polokalame – O le taua o tala toe faamatala i le si'os'iomaga o fanau i le la'asaga tauafua o le atina'e literasi.

Na fa'afetaia ai le susuga a le tama'ita'i pule ia Janean, Jason Tiatia o le sui mai le Ofisa o A'oga poo se tasi foi o sui o le Komiti Fa'afae, le tama'ita'i faia'oga o Sana Kakoi, ma le tamaitai faia'oga fesoasoani o Seira Sio, ae le itiiti i matua Samoa o le Vasega Samoa i Te Waka Unua, ona o le agaga sa'ili malo.

A matau atu i le tala o le atina'e o a'oga e fa'aaoga ai le gagana Samoa, o le ulua'i Lunita Samoa lenei i Karaiesetete ua faailoa lona opogiina o le tofamanino o le a'oga i gagana e lua.

Faatasi ma lenei feiloa'iga le folaina o se tasi o faama'ite fou sa ta'ita'ia e le aufaigaluega a le CORE EDUCATION, le susuga i le tama'ita'i mataupu tau Pasifika, Ruta McKenzie ma lona soa ia Lena Tuiloma, i le taua o tala toefaamatala, e fa'aaoga ai matua ma le gagana. O le sini ia mafai ona lalaga fa'atasi nei tala ma potomasani i le faatinoga o polokalame e a'oa'o ai le fanau, ma faapea ona faavae ai le fauga o ni alaga'oa fou e a'oa'o ai i latou.

Sa fa'asoa atu foi ni tusi faitau sa tusia e tamaiti o le vasega. O a latou tala ma ata e fa'amatala mai ai o latou matua matutua, tina ma tama, ma mea e fiafia iai. Sa matauina le fiafia o matua e fa'alogologo i tala fa'asoa a le fanau aemaise ua mafai ona tautatala mai tamaiti i gagana e lua.

O nisi o matua matutua sa auai foi. Ma sa maua le avanoa e fa'asoa ai le tinamatua o Lita Kakoi. E iai le tama a lana tama i le vasega. Sa soifua mai i Samoa ma malaga mai ai ma le tamā o le aiga ma lana fanau. Sa ta'utino e le tina, o lana fanau sa fananau i Samoa, lelei le tautala i le gagana Samoa ae taunuu mai i Niu Sila ua galo le gagana, ua taotasi i le Gagana Peretania ona o le gagana a lenei atunu'u.

Mulimuli ane ulufale i le A'oga fa'afai'oga, ma o iina sa iloa ai le taua o le gagana muamua. E fesoata'i lelei le mautu o le Gagana Muamua ma le a'oina o le Gagana lona lua, le Gagana Peretania.

O se fa'asoa 'anoa tele lea e molimau pea i le tulaga o le gagana ma lona faatauina. Sa momoli mai ai le taua o le gagana, tu ma agaifanua a i tatou lava. E iloa gofie ai fo'i lo tatou fa'asinomaga.

O le to'atele o matua o le 'autalavou. E iai nisi ua fa'aipoipo atu i papalagi, ae ua latou lagolagoina tele



Foliga fiafia o le fanau ma matua ma aiga i le taeao o le latou feiloa'iga, e 14 le aofa'i o le vasega ae e iai isi ua faailoa le fia auai.

lenei vasega Samoa. O lo latou naunauga, ia mafai e a latou fanau na ola a'e i Niu Sila, ona tautatala i le Gagana Samoa, iloa ona ola i tu ma aga fa'aSamoa. O le Gagana Peretania e ma'ua i soo se si'osi'omaga i lenei atunu'u. O se tasi o aiga na auai, o le tina papalagi e nonofo ma se tamā Samoa. Ae sa auai atu fo'i si ulugalii papalagi e lagolago le a'oga fou a le tama a si a la tama.

I le matau a le sui o le puletini, o se vaaiga faafiafia loto le opogi mai o matua matutua e pei o Lita. Pei lava o isi foi atina'e faapenei i a'oga sa galue ai, e iloga le tapua'iga a aiga, pe a ta'u le gagana poo le aganuu foi.

Sa fa'aiu le mafutaga i le saunoaga a le tama'ita'i pule e faafetaia le lagolago a matua ma aiga. Sa fa'ailoa foi le sao o nisi o e sa lagolago i le afuaina mai o le Tava'e, e aulia mai lenei laasaga. Sa faafetaia foi le lagolago mai a le matagaluega o a'oga i lana aufaigaluega.

Sa tali le sua a matua i le iputi mama sa saunia e le A'oga ma taape fiafia ai ma nai fa'alumaga o le mafaufau sa saunia e le aufa'asoa.

O le tatalo faaiu, ia avea lenei fatu ua toto ma se la'au e fua tele mai i le lumana'i. Ia avea ma se ofaga mo fanau e utuvai ai i a latou measina i nuu ua aumau ai.



Te Ope Whakaora

Family Store

Nau mai, haere mai, welcome!



Manuia tele le aso o Tina

E le uma le faafitauli o le lē lava o faia'oga



E manatu le aufaitofa o a'oga e iai le sootaga o le vave faamasani o fanau i le saienisi ma le naunauga e avea o se faiva

E le uma le faafitauli o le le lava o faia'oga, ma ua matauina lea pagatia i a'oga maualuluga a le atunuu.

I se ripoti a le Matagaluega o A'oga na fa'aalia ai le feagai pea o a'oga maualuluga ma le faafitauli, e aafia tonu ai le vaitausaga 2023-2024. Sa valo'ia le aofa'i e 370 o loo fia maua nei lava.

O lenei faafitauli o loo avea pea ma to'atuga i le vao mataupu o loo feagai ma pulega. Mo se faa-ta'ita'iga, i le naunauga e faamalosi le a'oa'oina o mataupu e iai le Sainenisi, Tekonolosi, Enisinia ma le Matematika (STEM). Talu ai le leai o ni faia'oga sa a'o'oga faapitoa i nei mataupu, o lea ua faatumu ai avanoa ia i latou e itiiti pe leai foi ni agavaa i lo latou a'oa'oina.

Ma e le fou lenei faafitauli o le le lava o faia'oga o tomai faapitoa. Ua iloa le faigata ona taofi le to'atele o i latou e i'u mai ma tu'ua Niu Sila mo isi atunuu e galulue ai. E mafua lea ona e sili atu tau latou te maua i na atunuu i lo Niu Sila.

O isi foi e gasolo atu e galulue i pisinisi tuma'oti pe fai a latou lava pisinisi. I le taimi nei o loo mana'omia tele i latou i galuega a le malo ma kamupani tetele tuma'oti.

E le fesoasoani foi le si'osi'omaga o a'oga e manatu e saisaitia ai i le va ma fanau a'oga ma pulega, ae le ta'ua le mataupu i totogi, e manatu i latou e le tusa ai ma taimi faigaluega.

E mamafa le pagatia i a'oga i nuu i tua poo na e taumamao ma taulaga; ua iloa fo'i le afaina o a'oga e vaivai tamaoa'iga e faatusatusa ma na e malolosi ona o faamanuiaga e maua. I le iuga o le aso, e filifili le faia'oga i le a'oga e lelei tau e ofoina.

Sa ta'ua foi i le ripoti le mana'omia o se alafua e tapasa ai le aga i luma. A o mana'omia tele e pisinisi ni e popoto i nei mataupu e fa, o lea fo'i ua sauni ai e ofoina atu ni totogi lelei mo latou.

Se'i vagana ua faaluaina na ofo e le malo, ona iai lea o se faamoemoe mo le faiva faia'oga.

O se popolega lea mo le lumana'i, aemaise lava mo tupulaga Pasefika ma Maori. Ua valo'ia le fai a'e o le numera o talavou Pasefika i le isi 20 tausaga, ma e matua tatau ona lava tapena i latou mo lena lumana'i o faatali mai.

Saunoa se faia'oga, e mo'omia e le fanau ni faia'oga ua iai agavaa tatau e a'oa'o ai nei mataupu. O ni faia'oga e le gata e iloa lelei totoga o le mataupu, ae iai foi le pulunaunau e faaosofia ai le fiafia i loto o fanau e a'o nei mataupu.

Ua iloa le 'alofia o le Sainenisi e le tele o fanau Pasefika, ma e moomia faia'oga e talitonu ia i latou ma ni o latou mafaia.

O le fesili, e faapefea ona faata'oto se alafua? Muamua, i se fuafuaga tuutumamao, e avea ai le aiga ma taulaga faama'ite. Faapea mai le ripoti, e le na o le malo ma le matagaluega e maua ai le tali. E taua tele le galuega a matua, i le sufiina o fanau ma faama'ite foi auala e faatupu ai lo latou fiafia i nei mataupu.

E amata atu lava i le tapulaa amata le naunauga e fia iloa le natura o se mea, e mafai ona taliina lea e ala i le Sainenisi, le Enisinia poo le Matematika. E faaosofia ai le mana'o e fia avea ma se faia'oga i nei mataupu. O le taua lea o le lava tapena o faia'oga i le a'oa'oina o nei mataupu, mai lava i a'oga amata e aulia le tapula'a maualuga.

Talia fiafia le ofo e faia'oga Amata

Ua talia fiafia e faia'oga A'oga Amata le ofo a le malo i o latou totogi. O le ofo lata mai lea o le a si'i ai o latou totogi i le va o le 11.1 pasene ma le 13.9 pasene mo sui auai o le iuni. I le pito i luga i latou o le a maua le siitaga e \$10,000 faapoopo, mai le \$90,000 i le \$100,000 ia Tesema 2024.

E lavea i totonu o le ofo le faapoopoga o livi poo aso ma'i i le 15 aso atoatoa, atoa foi ma se alauni mo faia'oga Maori i le a'oa'oina o a latou aganuu, ae faapea fo'i pulea'oga ia latou tapenaga.

Peita'i na saunoa sona sui, o loo iai pea mataupu tuua e ao ona tulituliloa i le malo. O le tele o nei mataupu ua faitau aso. E iai le numera o tamaiti i vasega, o taimi e malolo ai, ae faapea foi le tulaga o totogi o sui faia'oga (relievers) e tatau ona faaleleia. Ua iloa le su'egata o ni isi e suia faia'oga pe a gasegase, ona o le le lava o totogi e ofoina atu.

Peita'i ua te'ena e le iuni NZEI le ofo lata mai a le Matagaluega.

Te'ena NZEI le ofo lata mai a le malo

Ua te'ena e le NZEI le ofo lata mai a le malo e ala i lana Matagaluega. O le ofo lenei e siitia ai totogi o faia'oga tulagalua i le va o le 11 ma le 14 pasene mo le tolu tausaga. E aofia i le siitaga i latou i le pito i luga, e maua le \$100,000 i le iuga o le 2024. Mo i latou i le pito i lalo, o le a si'i a'e i le \$58,505.

E maua fo'i e le faia'oga le taimi paganoa e faaluaina, e fai ai ana tapenaga masani. Ua iai foi le alauni e \$5000 i le tausaga, mo i latou e ta'ita'ia faatinoga tauaganuu e ta'u ai le a'oga.

Peita'i na te'ena le ofo e le iuni, ma ta'ua foi nisi o mafua'aga.

Mafua'aga muamua, o taimi faigaluega e fua i le utiuti o faia'oga, o suiga e mafua i le Koviti-19 ma faapea ona aafia ai suiga o le ta'iala aoao ma aafia tonu ai faia'oga. O le taugata o le soifuaga e le o ogatusa ma totogi. E oo fo'i i le ofo e faapa'u le numera o vasega, sa tatau ona tuu mai i luma le aso. O mafua'aga autu nei ua faavae ai le te'ena.



Te Ope Whakaora

O le vaimasina lenei o le sailiga fesoasoani a le Salvation Army ia Niu Sila, e asia ai lou lumafale pe logoina foi lau faauta i luga o auala o fesoata'iga faaneionapo. O le a se foa'i tupe e te mafaia e lagolago ai ana fuafuaga, e talia ma le faafetai. Faafesoata'i le telefoni 0800 53 00 00, pe asiasi i le Upega Tafa'ilagi salvationarmy.org.nz. Faafetai.

Fa'autaga loloto

A ua e manatu e sui se mea, e lelei ona e mānava tasi ma fesili pe aiseā na tuu ai se na mea i lena tulaga i le taimi muamua

— G. K. Chesterton

TALA A'OGA NIU SILA:

Saili fofu matua ma le malo i le amio o le fa'aausa (veipa)

O LE veape Peretania 'vape' e faatatau i se amio e iloa faatasi ma e taumafa tapa'a. E folo i totonu le asu ma toe luai mai i fafo i le gutu. I le vaping poo le faatinoga o sea amioga, e folo le ausa o loo filogia ma ni elemene o vailaau, ma luai mai i fafo; e faavae i le talitonuga e mafai ona fo'ia ai le ma'i o le ulaula tapa'a ua faigata ona lafoa'i.

O le mau e faapea, o loo iai pea le nikotine i le paluga, ae e le tutusa ma lena e maua i le tapa'a mao'i. Peita'i la ua iloa le le faamaoni o lena faamatalaga. I su'esu'ega faavaomalo lata mai, ua faamaonia ai le le moni, ina ua iloa le solia o tapu, ma tuuna ai talavou ma fanau iti i se tulaga afaina tele.

I le vaiaso na se'i tuana'i na faailoa ai ni popolega o ni taiulu a'oga, ina ua iloa le sosolo atu o lenei faama'i i le tapulaa amata ma tulagalua. O le latou mau, talu ai le taofi e le 'afaina' naua pe a faatusatusa i le tapa'a mao'i, o lea ua faatau atu ai se ata ese i fanau iti. O se ata o se amio e le afaina ai se isi.

Peita'i na saunoa se pulea'oga, o le ata lea o loo avea ma faamata'u sili i fanau, ona o le taofi e le afaina e mafua ai ona faata'ita'i e i latou. Ae o le auala lena i le avea ma se tasi e ulaula, ma alu a'i ua le mafai ona toe lafoa'iina.

O ripoti o fanau iti ua latou tagofia le veipa, poo le tapa'a eleterone o loo aliali a'e pea i vaiaso ta'itasi, ese mai i talavou 18 tausaga i luga o loo ua avanoa faaletulafono i lona fa'aaogaina.

O molimau ia e faamaonia ai le sosolo atu o le amio i totonu o aiga, avea ai talavou ma faaa'oa'o i o latou tei laiti, poo matua foi o loo faia, ma faata'ita'i ai le fanau.

Saunoa se foma'i faapitoa, o le fa'aausa (vaping) o le faitoto'a lea mo fanau iti e ulufale atu ai i le lalolagi o tapa'a ma soo se mea e foloia i le gutu pe i le isu foi.

Talu ai le upu e le afaina, e faigofie ai ona laasia le tapu sa manino i le na o le tapa'a mao'i. I le tapa'a poo le sikaleti, ua iloa e le fanau e le faatagaina i latou e tagofia. Peita'i la i le iai o le isi filifiliga, ua faigofie ai.

E foliga ua ofoina mai e le 'aufaipisinisi tapa'a se isi filifiliga fou mo tamaiti, e faapea mai e lelei le tapa'a lea mo outou. O se folafolaga e foliga e faasaoina ai fanau mai le tapa'a mao'i ae meane o se mailei e ulufale ai ma le toe sao ese ai.

O le popolega o taiulu sa ta'ua, o le tulaga ua aliali mai nei i le to'atele o fanau talavou ua faata'ita'ia le fa'aausa, ae nai lo le faasa'olotoina, ua avea ma ni e ua saisaia ai.

O nisi matutua ua leva le ulaula tapa'a ma suia i le veipa, ua faapea foi ona saisaia ma faigata ona lafoa'i. Lea e manatu nisi foma'i, e mafua i le



I totonu o le fagu le vai ua filogia ma vailaau eseese e iai le nikotine, e liua ma ausa e feula mai i fafo o se asu pa'epa'e ae faafoliga

iai pea o le nikotine i totonu o le ausa o le tapa'a.

O se tasi o to'atuga i le talanoaga, ona o le mau eseese o vaega. E iai i latou e faapea mai o loo aoga lenei auala i le faalaloina o le numera o e tagofia le tapa'a mao'i.

O se su'esu'ega sa faia, e aumai ai se faaiuga lelei mo le 'aumatutua, Maori ma le Pasefika, ua fai ifo le numera o e tagofia le tapa'a mao'i, talu lo latou fa'aaogaina o le faa'aausa (vaping). Peita'i e moomia nisi su'esu'ega e aofia ai le atunuu lautele, e saga faamalosalia ai sea fa'aaliga.

O iai foi le itu e le taliaina sea mau, e talitonu e le o se fofu a o se faafitauli i le ola maloloina o le lalolagi. Ua valaau foi nisi mo le lafoa'iina o nei oloa ma tuu se tapu e taofia ai le toe faatauina atu i faleoloa.

I le tele o atunuu, ua faamaonia le mauaina o ni oloa ua solia tulafono o le gaosiga e pei ona tuu'autapuina. O mea e gaosi ai ma vailaau e tuu i ai, ua iloa le afaina ai o le ola maloloina o e fa'aaogaina. O popolega uma nei e faatatau i le tapa'a eleterone, ma i le vaai faalesoifua maloloina, e le taugofie lona siakiina i tupe ma le leoleoina pea lava pea.

I nei foi aso o fefaataua'iga sa'oloto i va o malo, e le faigofie ona faafoefoe le leoleoina ma le faatuma'ina o le pule a le tulafono.

O loo ta'imua Ausetalia i le faamalosalia o tulafono e puipui ai fanau mai lenei amio. E faasa le faatauina ai o oloa e iai le ausa ua filogia ma le nikotine.

E tusa i faamau, e tusa ma se 250,000 le aofa'i o Kiui latou te tagofia le tapa'a faa'aausa, tasi mai le lima o ni talavou. E sili atu le


to'atele i lo Ausetalia e fua i faitau a'ofa'i o malo e lua.

I se su'esu'ega faalelotoifale, e lata i se 10 pasene o fanau a'oga i le 9—13 tausaga latou te tagofia le tapa'a eleterone i aso ta'itasi, ae lata i se 20 pasene na ta'utino i lo latou faata'ita'ia o lea i le vaiaso na fai ai le su'esu'ega.

I Niu Sila nei, e lagolagoina le taofi e le o lava le malosia o le tulafono, e taofi ai le fa'aaoga sese o le sa'olotoga o fefaataua'iga, e mafua ai le faatau atu pea e ni faioloa o tapa'a faapea i fanau iti.

Ua faamaonia i ni sailiga faafoma'i i Amerika le sootaga o le fa'aausa ma ma'i o le mamā, fatuga'o ma le mānava. O lea ua faavae ai ni tulafono a ni malo e taofia ai le toe faatauina o nei sikaleti.

E 47 ni atunuu ua latou uia lea auala. E aofia ai nisi o malo tetele e iai Brazil, Argentina, Venezuela. O nisi e matuā sa taputapu, e iai Sigapoa, ma le tele o malo Arapi. E ono faapea foi Ausetalia ma Iapani i se taimi lata mai.



Fesili faigata:

Po ua tatau i le malo o Niu Sila ona vaoia faaletulafono le fa'aaogaina ma le toe faatauina atu o oloa o le tapa'a eleterone poo le veipa?

Manuia tele le Aso o Tina 2023

Avea o se faamanatu faapitoa i tina ua maliliu i kanesa o mama ma fatuga'o ona o le taumafa tapa'a. O se fe'au taua mo tatou uma i le taua o le soifua maloloina, aua mafutaga ma e pele.

Faasoa o le Vaiaso:

Afai e afaina ai, aisea e faataga ai?

O le fesili ua avea ma autu o le faasoa o le vaiaso, e afua mai i lagona o le to'atele o matua sa fesiligia, e le gata i Aotearoa nei a o le salafa o le lalolagi.

Aisea e saga tuuavanoa ai i se oloa poo ni oloa ua iloa le afaina ai o le ola maloloina o fanau?

O le tali e lavelave ma faaupugatā. O le manatu lea o le tasi vaega e lagolagoina le ta'otoga o loo iai. Ae e le faapena se taofi o isi malo i le mataupu. Faapea mai i latou ua lava ma totoe molimau e faamaonia ai le afaina, ma ua tataua ona fua le tapu.

I le faafanua i luga o loo faailoa ai ni malo ua latou vaoia le faatauina atu o le tapa'a-e (sikaleti eleterone). O le 2017 lena, aulia mai le 2023 ua atoa le 47 atunuu ua uia le auala lea.

A matau ma le toto'a e mafuli i le konetineti o Amerika i saute, atoa ai ma se vaega o Asia i saute. O isi konetineti ma malo tetele e le o auai pe fia auai foi. O nuu pei o Saina ma Initia, Amerika, nuu Europa, o loo faaputupu ai se pasene maoa'e o le fanau a tagata, e le o iai i le kalapu.

A taga'i i le Pasefika, e aunoa se malo e fia auai i leni taulagalaga. Afai la e fai se palota e fua i le aofa'i o atunuu, e malo mamao le itu e lagolagoina. Peita'i e le o se molimau faamaoni lena i le lelei poo le leaga o se faaiuga. Auā e fua le lelei o se tonu i le maulalo o le afaina o le soifua o tagata.

O le mau a malo e te'ena, e leai se mea lelei e maua mai i le faatau atu o nei tapa'a i fanau; ma e le finauina le iuga: e afaina fanau pe a tuuavanoa le tulafono.

O nisi malo o loo latou faamauina le tapa'a-e i lalo o le vaega, o se vaila'au. E iai Amerika, ui ua



iloga ni su'esu'ega a ona tagata su'esu'e, e faamaonia ai le sootaga o nei tapaa ma ma'i, e iai le faigata ona manava, afaina o fatuga'o ma le kanesa o māmā.

I le Pasefika nei, o loo pito i luma Ausetalia i leni finauga, i le va ma Niu Sila, Ausetalia na te faasāina oloa na e filogia le ausa ma le tasi o elemene oona le nikotine. Ua vavala mai foi ni faailoilo o lona se'e atu e vaoia nei oloa mai le toe faatauina atu.

I Niu Sila, o loo fa'aauu pea le finauga, ia i latou na e lagolagoina, ma sina vaega ua manatu e fai se vavao. Niu Sila o se atunuu temokarasi e tuuavanoa tele i aia tatau a tagata poo vaega. A o talanoa isi malo i le taofiofia o le maruana, ae o loo talanoa Niu Sila i le taimi e tatala ai leni vavao. O lona uiga, e le faigofie sana faaiuga i leni fo'i mataupu.

Ona iai lea o tafa o polotiki ma le tamaoaiga, e faamua ai le aia tatau ma le tuuavanoa i mana'oga o tagata lautele. E manatu ai e mafai ona faatonutonu le gaosiga o oloa e taofiofi ai le afaina.

Ae pei ona finau mai le itu tete'e, o le afaina ā o le afaina, e leai se kanesa laitiiti ma se kanesa lapo'a. A pulea loa se tama ma se teine i le malosi o nei tapa'a, e le faigofie ona toe sao ese.

O le tau e totogi mo le tamaoaiga o se malo e le taugofie, ma e talitonu o le tofa mamao lena o loo faavae ai faaiuga a malo e te'ena nei oloa.

Tulimauu o Pola:



E muamua la'u faafetai i le Tamā i le lagi i lou soifua ma so'u malosi ua tatou toe fesilafa'i ai i leni foi taeao manino. Talitonu sa manuia fuafuaga o le vaiaso na se'i tuana'i. Malo le soifua maua.

Tele fesili faigata o leni vaiaso i lo tatou li'o a'oga, ae le avea le faigata ma se mafuaaga e taofi ai le asiasiga a le mafaufau. O le mataupu i tapa'a nei e tino ausa e fai foi si faigata. Pe mafua lea ona o polotiki o loo tau manogi mai ma namuasua ai le fale. I Amerika na lagolago e le FDA le finau e le o se tapa'a le sikaleti eleterone, a o lea ua toe sui le mafaufau, fai mai e sa'o, o se tapa'a. E moni le upu, e 'asa le faiva ae le 'asa le masalo. Malosi tele le paoa o kamupani gaosi tapa'a i Amerika, ma o se ata lea o le finauga i le va o Tavita ma Koliata. Ae tatou te finau pea, logo pea le tala, e iai lava se aso e faalogo mai ai Filisitia ma le 'aufai tapa'a.

O le fesili pe le ua tataua ona taofi loa le faatauina mai o tapa'a nei, o lea ua iloa le afaina ai o fanau. O le tali, se'i iloga e fai se faaao o Niu Sila lava ia ona faato'a maua lea se autasiga. Pe faapea foi, se'i iloga e iloa e le malo ua afaina se 50 pasene o aiga papalagi ona faato'a fua lea o se tapu. Sa ou fesili i la'u uo o Filifilimapuapuaga, o lana tala, Pola, e faavae mea uma i le tulaga o le palota. Soo se faigamalo, afai e afaina ai le toe fo'i mai, ona teu lea se'i iai se aso. O soo se malo lava e solia le tulafono lea, e vave ona fafo ma le maafala. I nei aso ua malosi foi le finau a talavou e ala i le pepa palota.

Na faamanatu mai e la'u uo o Fili le tulaga o loo tupu i Amerika, i le pule sa'oloto a i latou e ulufale i lotoa a'oga ma tafana pepe meamea pei o se taaloga. O lana tala faata'ita'i lea i le malosi o le mana'o i le tofi na i lo le alofa ma le mafaufau tatau. Pau a le mea o loo i mafaufau o le tele o faipule Meleke, o le toe tu mai i le isi faigapalota. Talu ai o le fana e pei o se isi measina i se aiga Amerika, a ua avea ma avanoa mo nisi e tafilisaunoa ai i le ola o fanau iti. Asosi o fana i Amerika o se tasi o faa-lapotopoga mauoloa ma le paoā. Upu moni, o le ā lava le umi e taumau ai Amerika i lea tu, o le umi foi lena e fesaga'i ai ma leni malaia, e pei se ata e taumulimuli ia te ia i taimi uma. A o se faamanatu foi o le tulaga manuia o loo tatou o iai, i le vaavaaia lelei o nei auupega, ma faamamao ese ma aiga.

O le faalavelave i si atalii na malemo i Whangarei o se tala faanoanoa tele. Aemaise pe a manatu i le tele o faailoilo sa tatau ai ona taofi. E iai ni mea faapea na tutupu, ma nisi na toe ina tutupu. Ou te taofi a'u pe mafua i le manatu foi lea, o lou lava tuafale ua e masani ai. Pe atonu sa faapea se manatu i e na ta'ita'ia ae faapea foi le fanau. E iai le lagona lena e maua ai nisi e tafafao, ua sopoutu le lagona fiafia, fia iloa, ua galo ai e iai lamatiaga i soo se gaiouga. O se lesona taua leni, utagia fautuaga a e atamamai i le tau, a ia sili ona utagia le natura lava ia. E le iloa gata foliga o le tau, se'i vagana ua e fia tofotofu.

O le tasi o fesili i leni lava malaia, pe sa iai ni life jackets talu ai e sua le ana. Atonu e ono faasaoina le atalii pe 'ana iai se puipuiga faapea. Ae mo le pulega, e tele lava ni fesili faigata o loo tau sailia ni tali, faapea foi le matagaluega, i nisi o ta'iala fou e faamautinoa ai le le toe tula'i mai o se malaia e pei o leni. Manuia.

Fa'ailoa i se su'esu'ega le sao taua o tina

Sa ta'ua i le pito i luma o le tatou puletini le galuega a le alii foma'i ia Tofilau Gaugatao Siliva, i lona tauaaoina o le tusipasi maualuga a le iunivesite a Aukilani, ma o lana autu e ave ai le faamua i le sao o tamā i a'oga a le fanau.

Ae na manino mai i le galuega e le o tamā a o tina e mafuli i ai le uluulu o le la'au. O tina e alu e feagai ma faia'oga ma le pulega, o tina e usupo i le taeao e tapena fanau mo le a'oga, o tina i soo se vaega o leni atina'e taua e fitoi tonu i matua.

Se'i vagana sina pasene faatauavaa o tamā, o le upu moni lava ia, a leai ni tina e leai ni lumana'i o fanau e ala i le a'oga. Afai la e iai ni tamā sa tausia na o latou a latou fanau, ina ua leai ni tina, ma i'u lelei fanau i a'oga, o ni tamā na e le laumaua.

Ae e mafai ona finau mai tamā e le sa'o atoatoa sea taofi. E pei ona manino mai i le galuega a Tofilau, o le to'atele o tamā sa faatalanoaina, e manatu o lo latou sao e auala lea i le totogiina o pili o le fanau, ma le tausiga o le aiga e ala i totogi o galuega. Pe momoli foi le fanau i le a'oga.

I le iuga o le aso, e foliga e lagolagoina le mau, a galulue faatasi tamā ma tina, ona va'aia lea o se atina'e manuia e fua mai i ona lava fua e pei ona ta'utino le faisalamo (Salamo 1).

Ua iloa le eseesea i taumafaiga a tama ma teine, e le na o Niu Sila ae faapea le tele o malo o le lalolagi, e ta'imua teine i ausiga, ae taus'i mai tua la'a a tama, o le taua lea o le galulue faatasi o matua. Aemaise lava ia tatou faiganuu e faamoemoe mea uma i le tina.

Ae pei ona molimau fo'i le saienisi o le mafaufau, e telē se aafiaga lelei mo se tama i le va'ai atu o loo savalivali mai lona tamā i talanoaga ma faia'oga. E fa'aosofia ai le loto e taumafai atili.

A tatou tulimata'i le tulaga maoa'e o ausiga a fanau tama i taaloga, e molimau ai i le lagolago a tamā i o latou faiva. A fesili i se tasi o nei alii ta'alo, e mautinoa e faapea mai ua ala ona manuia le taumafai ona o le to'aga o le tamā e momoli i toleniga, ma malae e ta'a'alo ai.

Talitonu fo'i e faapena le mana'oga o fanau i soo se tafa o tauiviga, e aofia ai le potua'oga.

Ae i leni Aso o Tina, tatou te patipatia lo latou sao i a'oga a le fanau, pei ona molimau Tofilau.

Ne'i Mea Ane ua Galo

Faamasino Samoa mo Samoa



LEI AVEA le tulaga fou o Samoa o se Malo Tuto'atasi ma se suiga atoatoa i faiga, tofiga, e o'o lava i foliga. Sa tumau lava le tele o faiga faavae i galuega ma auala o faatinoga. E faapena foi i tofiga, sa molimauina pea le fa'aauauina o tofiga o i latou e pei o faamasino

o le Faamasinoga. Mo se faata'ita'iga, afua mai i le 1962 e aulia le 1982, sa faalagolago pea Samoa i faamasino mai Niu Sila ma Ausetalia. Lona uiga e 20 tausaga atoatoa ae faato'a a'e se tofa i le malo o Samoa e tofi sana tamafanau e ta'ita'ia le Faamasinoga.

Lea na tofia ai Vaovasamanaia Filipino (ata) e le Ao o le malo, Malietoa Tanumafili le Lua, i fautuaga a palemia e to'alua, Tupuola Efi, a o lei faia le palota, ma Tofilau Eti, ina ua tula'i mai e tauave le tofi palemia.

O se autasiga faapea i ni vaega faaupufai a Samoa e viia, ina ua faasili le agavaa i lo ni eseese faavaega. (Ui e ese foi le tilotilo a nisi i aga o sea autasiga). O agavaa o Filipino e aofia ai lona potomasani o se matai Samoa, tupu a'e i le si'osi'omaga o le faaSamoa, tautua i lona afioaga, o se loia ua masani i aga o le tulafono, ona faaopopo lea i ai ma tomai faapalemene i le fauga o tulafono, le potomasani faaupufai o malo a o se'ei i le kapeneta, e tulaga ese ai mai isi sa tauavea le tofi.

O Vaovasamanaia na suia Russell Callander, o se alii Niu Sila sa tauavea le tofiga i se konekarate e lua tausaga; peita'i na o le 6 masina na galue ai ae faamavae ona o gasegase o le tino (manatu nisi o se tala e avane ai).



~ ME 16 - 31 ~

- 16
1877 Auina atu misionare a Samoa Niu Kini
1997 Ulua'i malaga Samoa Air va o Tutuila ma Maota i Asau Savaii
- 17
2005 Malo Samoa ia Toga 26-15 i Suva
- 18
1875 Tusi se faavae e Steinberger o Taimua
14 ma Faipule 20
1942 Faamau numera Vaegaa'u Lona Tolu Malini Upolu ma Savaii e 4853
- 19
1891 Maliu Misi Tana (LMS) i Lonetona
1909 Maliu faioloa August N Nelson
1965 Maliu liga Pisa, i lona 83
2000 Auina sui 25 leoleo i Timoa Sasa'e
- 20
1971 Tatala uafu i Asau e le Mini Lagoon
1975 Tuumalo palemia o Samoa Fiamē Mata'afa FM le Lua
1983 Tofia Vaovasamanaia Filipino ulua'i faamasino sili Samoa
- 21
1975 Suitulaga Tamasese Lealofi IV ia Fiamē Mata'afa ua maliu

- 22
1839 Tatala ulua'i falelomitusi i Samoa, i Falelatai, pulea e Misi Sitea
1849 Paulo ulua'i faifeau galue i Niue
1875 Tofia Malietoa Laupepa ma tupu i le faavae a Steinberger
1960 Lofia Samoa i se galulolo malosi
1988 Avea Fatialofa kapeteni Manu Samoa
- 23
1839 Tatala faleoloa o John C Williams, atalii o Ioane Viliamu, i Apia
1965 Amata togafitiga o le mumu i nuu o Samoa
1987 Tatala ofisa fou, asosi a e po le vaai
- 25
1960 Ulua'i malaga Polenisia va o Faleolo ma Tafuna
- 26
1927 O le ulua'i lomiga Samoa Guardian
2000 Ave ese fanau mai le a'oga a le USP i Fiti ona o vevesi faaupufai a Fiti
- 27
2009 Ulua'i fusuaga a Sonny Bill, malo ia Gurry Guru
- 29
2000 Taunuu i Faleolo le sulu Olimipeka
- 31
1972 Tatala maota fono fou i Tiafau

Aulia mai le nofoaiga a Callander, ua logo ia Samoa se siuleo o le faameo, faapea e le malamalama faamasino papalagi i tu ma agaifanua a Samoa, e mafua ai ona latou faamatala pitotasi le faavae ma tulafono. Ina ua tofia Vaovasa, na lagona le mapu fiafia, 'faafetai ua tula'i mai se Samoa.'

Faata'ita'iga, o nisi o faaiuga sa faia e faamasino mai fafo, e aafia tonu ai tagi o faiga palota, sa iloga le faitioina. E iai faaiuga a i latou i le mataupu i faatosina o palota ma tu masani o fa'aaloaloga faaSamoa. O fea le tua'oi? I la latou vaai, o soo se mea e avatu, taimi o palota pe leai fo'i, o se faatosina.

O mataupu i le va o aia tatau a le to'atasi ma le to'atele, i se nuu o alii ma faipule, sa avea foi ma talanoaga faalaua'itele, ona o le lilifa o faaiuga a faamasino i le aia tatau a le to'atasi.

O le faaiuga a Russell Callander i le mataupu a Vaai Kolone, na mafua ai ona ave ese le tofi palemia, na iloga foi lona faitioina, poo lea na

faapogai ai lana filifiliga e faamavae. Pei ona molimau se nusipepa o lea taimi, sa auina atu se tusi faamata'u i le ofisa o le alii faamasino, e le iloa pe mai ia te ai, talu ai lana faaiuga.

Ua atoa ai nei le to'atolu faamasino sili o ni suli o le eleele, ma e ui ina taliina ai le mana'o o Samoa i ni e 'e malamalama i le aganuu, ae talitonu e le suia ai tulafono tumau (principles) e feagai ma soo se faamasino, i le tausisia o le mea amiotonu pe afa'i e lamatia le aia tatau a le to'atasi po'o le tagata vaivai. E faapena foi pe a lamatia le aia a le to'atele ona o le to'atasi.

E iai le manatu e sili se agavaa ia tatou lava faamasino e faafoefoe ai le vailiu lea. I le taimi fo'i e tasi, e matua taua le sa'olotoga tuto'atasi, ma le saogalemu o faamasino e fai ai a latou faaiuga e aunoa ma le faamata'uina.

Ata i lalo: Le alii faamasino Samoa muamua, Vaovasamanaia Filipino, ma nisi o tamalii sa taiulu i galuega a le malo i lea vaitaimi.



TA'ALOGA FOU ATIA'E AI TOMAI I GAGANA E LUA:

Ta'alogaga fou mo tamaiti

PI the Speller

- Rules:
1. Build as many English words as possible, start with three letter words.
 2. Every word you build must include the Alpha Letter (centre).
 3. Each letter is used only once, including the Alpha Letter.
 4. The class as individuals or groups can play this game. 1 point for each four letter word, 2 for each five letter word, 3 for each six letter word or more


Three letter words _____

Four letter words _____

Five letter words _____

Six letter words _____

O le Paso Numera



© Ken Egan - mq1001

ACROSS

- 1 .. 291 - 45
- 4 .. 588 - 48
- 7 .. 943 - 80
- 10 .. 8766 ÷ 9
- 12 .. 465 × 2
- 14 .. 3 × 4
- 15 .. 2724 ÷ 4
- 17 .. 385 ÷ 7
- 18 .. 82 + 51
- 20 .. 305 × 2
- 23 .. 6860 ÷ 7
- 25 .. 839 - 28
- 27 .. 405 × 2
- 29 .. 27 - 10
- 30 .. 939 - 78
- 32 .. 13 - 3
- 33 .. 3524 ÷ 4
- 34 .. 110 × 8

DOWN

- 2 .. 341 + 143
- 3 .. 33 × 2
- 5 .. 1796 ÷ 4
- 6 .. 484 + 107
- 8 .. 78 + 310
- 9 .. 26 + 79
- 11 .. 70 + 651
- 13 .. 3150 ÷ 9
- 15 .. 9 × 7
- 16 .. 127 + 41
- 19 .. 155 + 236
- 21 .. 7 + 101
- 22 .. 107 + 474
- 23 .. 8334 ÷ 9
- 24 .. 400 ÷ 4
- 26 .. 890 ÷ 5
- 28 .. 55 × 2
- 30 .. 9 × 9
- 31 .. 29 - 11

SALAMASINA: O LE ATA A FATU FEU'U



FATU AKELEI FEU'U, ONZM, 77, o se tusiata lausilafia i Niu Sila i ana ata poo mamamu e tuese foi mai isi. O ia foi o se tufuga tafaatagata, ma o le tele o ana galuega o loo teuina i falemata'aga ma lotoa o a'oga a Niu Sila. Na ia maua ni faailoga taualoga mai ana galuega, tele nisi taleni talavou na ta'aina i lona faiva. E afua mai i le nuu o Poutasi, Falealili.



O NI SOLO

TINA

- 1 Tina o le upu e tasi
E le lava upu a tagata e fa'amatala ai lona uiga.
- 2 O tina ia te a'u o le aofa'iga o mea lelei uma suamalie, matagofie, logomalie
E au lona sasala i le lagi.
- 3 E leai se isi e sili lona alofa ia a'u na i lo oe, tina, i taimi fiafia ma aso faigata.
- 4 Tina o oe o la'u vavega
O la'u rosa na tau mai i le fa'ato'aga i Etena
Ou te alofa fa'apelepele i ai.
- 5 E lima mata'itusi e sipela ai tina,
A L O F A.
- 6 Ana ia te a'u le lalolagi uma,
Po ua ou tu'uina uma i ou luma
E fai ma a'u meaalofo mo oe i leni aso o tina.
- 7 O oe o la'u rosa matala
O le taimane e pupula ai o'u mata
E le fa'agaloina oe i lo'u agaga.
Se'ia ta toe feiloa'i i le aso gata'aga.



Saunia e tamaiti O le Ta'iala, Finlayson Park, 2012

TALA O LE TAUTOULU MAI NIU SILA MO TAMAITI

O le tala i le fale tuufua



LELEI le ma faigauo ma la'u uo e igoa ia Samu i se tama'i aai i Rotorua. E fesaga'i tonu lo latou fale ma se fale tuufua e faapea se taofi e nonofo ai aitu.

O le isi la aso na sau ai la'u uo ma se tonu faavalevlea ma te o i totonu o le fale, ona ma o ai lea e autilo.

Talu ai e to'atele o matou tua'oi, o le mea lea na ma taumafai ai e feosofi mai i le faitoto'a i tua, peita'i sa loka. Ui i lea sa iai se ava i le puipui o le faletaavale. Na ma femaulu ai nei ma lagonaina loa se manogi.

O se maile ua pe (ituaiiga Siamani ou te manatua) i se tulimanu o le faletaavale. E foliga ua tele ni aso na taatia ai. E le i faatuai lo ma toe femaulu i fafo ma toe fo'i atu i le fale o Samu.

I lena po na ma taumafai ai e a'o le tatalaga o se loka ina ia mafai ona ma ulufale i totonu i le aso e sosoo ai.

O le mea muamua lava lea na ma faia i le taeao po o le isi aso. E le i manuia la ma taumafaiga i le loka, ae ona o uiga faa-tamaiti lava na mafua ai ona ma toe femaulu e vaai le maile. Ma te o atu, ua leai se maile. Ua leai lava ma sina foliga e iloa ai le mea sa taatia ai—poo se tasi mea lava.

A o ma savavali ese ma le fale ae faafuase'i ona ma lagonaina se pa'ō leotele mai le faletaavale na matuā lagona ai lo ma pala'a'ai tele, ma alu loa la ma taufetuliga i le fale o Samu.

E le o se mea lelei mo ma'ua auā na iloa mai e le tina o Samu la ma tamo'ega; ua uma ona ia lapata'ia ma'ua e 'aua ona ma faalatalata i ai. Na ma fesili i ai pe aisea ae faapea mai lana upu: Muamua, e le so lua fale. Lua, e aitua le fale.

O le tina o Samu o se Maori e talitonu i agaga ma mea faapena. Na ia faamatala nei ia i ma'ua le tala i le tamaloa sa nofo ai. Mo mafua'aga patino, o le a ou le ta'uina atu le igoa moni o le tamaloa.

A o soifua le tamaloa, na fanau lona to'alua o se teine. O taimi pito fiafia ia o lona olaga. O lona afafine lona mitamitaga ma le oliolisaga o lona agaga.

Peita'i na tupu se faalavelave ina ua matua le teine. A o taumafai le faatosaga e faaeseese ia ma lana pepe, na maliu ai ia ae ola lana tama. Na ta'e ai le 'afa o le fatu o le tamaloa i le oti o lona afafine.

Ona tausi ai lea e i laua ma lona to'alua le tama a la laua tama. Ua te'a ni tausaga ona oti fo'i lea o lona to'alua e le mautinoa le mafua'aga. E faapea na savalivali o ia i totonu o le fale ma pa'ū faafuase'i ma oti



ai lava. (Fai mai le tina o Samu e le i toe loteina e le tamaloa seevae mamoe o lona to'alua i le mea tonu na pa'ū ai). Na avea lenei mea tiga ua tupu ma auala o le ta'e o le isi pito o lona fatu. Toe o lona afafine laititi (tama a lona afafine) le faamoemoe ola o loo totoe ia te ia.

Ae ina ua matua le teine, ona alu ese lea ma lo la aiga, na uma ane ua o ma lana uo tama i Egelani e nonofo ai.

Ona alu lea o le toeaina ua faatau mai se maile e fai ma ana pa'aga. Na ia sasaa uma lona alofa i le maile e ala i mea'ai taugata ma meaalofa e faatau i ai. Ae na avea lea ma mea na vave ai ona pe le maile (ituaiiga o le leoleomamoe Siamani o la'u mate).

Na lagona ai lona toe mafatia tele. Peita'i sa mafanafana lona loto ona o loo ola lona afafine laititi. O ia le mafua'aga o lona iai pea i lenei lalolagi.

Na maua sa la fesoota'iga ma lona afafine laititi. Na ia faapea mai i le toeaina e le toe fo'i mai i Niu Sila. Ailoga fo'i e sau i lona maliu. O le tala lea na nuti lilii ai ni toega o lona fatu ma maliu ai lava."

Ina ua uma ona faamatala le tala e le tina o Samu na maua ai fo'i ma le tonu, ma te le toe o i le fale. Ma te le toe faalavelave i le toeaina mafatia. Ae lelei ona tuu ia e malolo filemu.

I le tausaga na sosoo ai na sui ai la'u a'oga ma ou te le i toe vaai ia Samu i le isi fitu tausaga. Ae ina ua atoa lo'u 17—ua fai fo'i la'u taavale, na toe maua ai le ma fesoota'iga ma la'u uo.

Ona ou alu lea e asiasi i ai. Na muamua lava aga'i la ma talanoaga i le fale tuufua. Ma te iloa lelei atu lava le fale; e le i telē lava se suiga mai ona foliga i le fitu tausaga ua alu.

I lena afiafi ina ua alu le tina o Samu i le

papu na ma o ai ma Samu e toe siaki le fale. Ou te le i popole i le loka auā ua lava lo'u potomasani i le tatalaina o loka eseese.

Ae ina ua ma'ua taunuu i le pito i tua na ma vaai le faitoto'a ua matala. Masalo o se tasi na taumafai e ulufale i totonu. Peita'i e le i mamao lana alu auā e iai le isi faitoto'a o loo mau pea lona loka. E le i umi se taimi na ou punou ai ae matala.

Ina ua ma ulufale i totonu na ma vaai se pea se'evae mamoe o loo taatia i autafa o le faamalama (ou te manatua e le i loteina e le toeaina). E foliga e faasasaga i fafo. Na ma iloa fo'i se pea seevae tamaloa e taatia tonu i luma o le tasi nofoa e faasaga i le magālafu. I luma o le isi nofoa o loo taatitia ai ni seevae fou lava o se tama'ita'i.

Na tau pe lo'u fatu (ua ou manatua le afafine!)

Na faasolo la ma vaai i ata o loo teu ai le magālafu, e leai ma se apogaleveleve o pipii i se ata. O se mea tulaga ese!

Na vave ona o'o mai ia i ma'ua se lagona o loo mata'i mai a ma gaioga e nisi. . . .

E le i leva atu le oti o la'u uo o Samu. A o le i oti na vili mai ma fai mai, "Ua atoa le aiga!"

"O le a le uiga o lau tala?"

"Na ou toe alu lata mai nei i ai, na ou vaai lava i ai i se pea se'evae fou lava, e tusi ai le upu: "Gaosia i Egelani."


Fai mai le to'alua o si a'u uo, e le i ma'i, ae na pa'ū faafuase'i ma oti ai lava, a o savalivali solo i totonu o lo latou fale.

Ou te lei alu i lona maliu, ona o le taimi tonu lea o le Koviti-19, ae sa ou miti i ai, na ou vaai atu o loo ta'a'alo la'u uo ma le maile a le toeaina i luma o lo latou fale.

Ua uma le tala.

~ TAALOGA PASO SAMOA I LE GAGANA SAMOA ~ POTO LAUTELE ~

1. Faatumu le pusa i upu/igoa Samoa poo se tasi e faatonuina.
2. E lua faailoga ta'i \$100 mo se to'alua muamua e mafai ona la faatumuina le paso i lona sa'o atoatoa.
3. E leai se tasi na maua le faatulagaga sa'o o le paso lona 5.



Copyright LPSL Tavita 2023

FAALAVA ~ ACROSS

1. Upu o maliu, e faatusa i ai le malolo a tua'a i tuugamau (6)
4. Se suafa o le akiepipokopō ua tuua le malo (9)
8. Suafa tupu Peretania lea na se'i faato'a faau'u (6)

13. O se fugalaau lanu samasama (10)
16. faia i se auala e malamalama uma ai ma tamaiti (10)
19. Saili le Fuiupu Nauna: se measina tuai (5,6)
20. tau'i tupe faaopoopo i le totogi masani (6)

21. o se i'a e iai se ivi i lona muaulu (5)
22. fa'aaloalo i matua (3)
25. e tutusa i tausaga poo mafaia (5)
26. gutu o se maugamu (3)
27. Kalama: fasi upu e fauina veape (3)
29. Taaloga: Fasi laau e velo (3)
30. Pese tamaiti: Ua _ mai le timu (2)

PASO SAMOA ASO O TINA 2023

- 33. faamama lavalava (2)
- 34. tele i'a o le faiva (2)
- 36. Talatuu: Tulafale ta'uta'ua i le lauga umi (4)
- 37. Tusi Paia: Faitaulaga na tausia Samuelu (3)
- 38. "leova i lo tatou _ . Tofa" (2)
- 39. O se matai mai Faleasi'u (4)
- 41. faataau i se tagata ave avega (6)
- 44. Sa ta'ita'i i le Samoa Party: ? Nemaia (3)
- 46. Mea'ai e ulufale ma se sui fou (2)
- 47. Fania: vaega e muta ai (3)
- 48. Tala faasolo: O se alii faimeamalie mai Salafai tausaga 70-80 (6)
- 49. vaomatua (se isi ta'u) (6)
- 50. o se 'alā 'amu telē i le sami (2)
- 53. O _ o Atua ma iu o Atua (2)
- 54. Pese: O lana _ i o'u luga o le alofa (3)
- 56. Mea'ai lelei taumafa ma le saka (4)
- 57. e le mautinoa le iuga (7)
- 59. vaega pito i luma o le vaa (6)
- 62. o se manu o le gataifale (5)
- 63. Faalupega Malie: matai e ta'u o le matua (10)
- 64. Tusi: o le a le laau uliuli i se tusi sa faaliliu e Fanaafi Ma'ia'i? (6)
- 67. igoa o se faletalimalo i Apia, amata i le igoa o se manu (7)
- 68. vaavaaia se tasi e leoleo (6)
- 71. faapuupu: aga faatamalii (3,4)

- 73. Pese lotu: E _ pea lava pe a e iai, lesu e lesu e (2)
 - 75. Pese: Samoa _ ta'utino mai (2)
 - 77. faaoso e fai se misa (4)
 - 78. liligi ia lilo atoa le ipu (7)
 - 82. Talatuu: atua tama'ita'i na valoia le oo mai o le talalelei (7)
 - 83. atulaina o laau mmf (2)
 - 88. Pese: Lo'u fatu e ua ta'e vaivai ai le tino, le uo moni aue o le _ (1,4)
 - 91. Manulauti o le 60 tausaga faamanatu (5,2,2,9)
 - 92. Suafa lausilafia, maliu e lei mamao atu: Viliamu _ (5)
 - 93. Tusi Paia: tupu Aikupito (5)
 - 94. igoa o se fale maliu (8)
 - 95. o se meafaigaluega ta tatau (2)
- LALO ~ DOWN
- 1. meafaigaluega e ta'iala ai se va'a (6)
 - 2. faaopoopo atili (le atamai mmf) (10)
 - 3. Na faia e le Atua (8)
 - 4. ta'ita'i ta'uta'ua Saina Komunisi (3)
 - 5. Suafa Manu Samoa: _ Vaega (3)
 - 6. Fuiupu: Ua _ i luma Samoa (6)
 - 7. Taea: Malaeola ma ? (7)
 - 9. taulia, amana'ia (4)
 - 10. Tusi Paia: igoa uso matua o Tavita (1 Samuelu 17) (6)
 - 11. saili ni tomai (2)
 - 12. O se ituaiga o laau fai musika (5)
 - 14. Lakapi Aotearoa: Maa ? (4)

- 15. ta'ita'i o se vaega i se galuega (6)
- 17. o se meaola i le gataifale (3)
- 18. umi ona le iloa atu le masina (7)
- 23. se vaega o le tatau (3)
- 24. afioaga e ta'u ai le upu 'maninoa' (5)
- 27. sa'e fuli le vaa (3)
- 28. pule (se isi upu) (3)
- 31. Tauese i Apia: fale sa fai ai tifaga ma fusuaga (6)
- 32. maile (se isi ta'u) (3)
- 33. e sele ai le 'ava poo le ulu (4)
- 35. faia se fe'au, alo i se faiva (13)
- 39. Faamatala ai galuega faifaatoaga i fatu laau (4)
- 40. Fuiupu: le faapolo ma le _ (7)
- 42. Faipule Magele: Aupito W _ (3)
- 43. Upu faatusa: O loo tatou _ i le olaga (9)
- 45. faalagolago i le Atua (9)
- 51. O se nuu i le atu Fagaloa (6)
- 52. o se mea e fiafia tele i ai ft. taaloga (5)
- 53. Fuiupu: Ua _ malo faiva (2)
- 54. O se tautinoga tusitusia e faamamalu e tagata o se malo (6)
- 55. o se tofiga taua i faiga malo temokarasi (9)
- 58. E usu se pese ae _ se tatau (2)
- 60. Talatuu: O ai le toeaina na mapu? (4)
- 61. Upu a'e: o se tagata gugutu (2)
- 63. Tupuaga o se nuu i Salafai iai le malae o Finao ma le vai malulu tele (4)
- 65. Suafa sui palemia: Tuala _ Ponifasio (3)
- 66. O se lanu vaivai , faatusa o le loto fiafia (8)
- 69. Veape motale: e naunau atu, taumafai(3)
- 70. Toega o le 'ava e totoe i le tanoa (3)
- 72. O le upu e fai _ o le gataifale, ia seu le manu ae taga'i i le galu (1,6)
- 74. na malaga mamao mai i le sami le 'ea (6)
- 76. o le pogai o se mea (2)
- 79. maua atu le aso o le faamoemoe (5)
- 80. la'ei e momoli ai le taulaga (5)
- 81. mea taumafa o se faalavelave (4)
- 84. suinauna peresona numera tolu (2)
- 85. Pese a tamaiti: A iai lesu i lo'u va'a ou te 'ata i le _ (3)
- 86. Ave ese faafuase'i se mea, pei o aga a manu i mea'ai (4)
- 87. Evagelia lona tolu Feagaiga Fou (4)
- 89. O se suafa e iai i faalupega o Faleula (4)
- 90. Fale o le tulafale (4)

TALI O LE PASO 5 SI'OSI'OMAGA (E LEAI SE TASI NA TALIINA ATOATOA LE PASO)

P	A	T	E	L	E		T	A	M	A	S	E	S	E		M	A	T	A	A	F	A
I		A		A			A		A			F	S		I		U		N		F	
N	A	M	U	L	A	U	U	L	U		F	A	L	E	O	S	I	A	M	A	N	I
E		A		O		U		U	S		A		F		E		I		M		O	
L	I	M	U	L	I	M	U	T	A	U		T	E	U	I	L	A		T	U	A	
O		A		A		I		A		A	T	U		L		A		F	A	A	T	
	M	A	U	G	A		O	L	O		E		F	U	A		T	I	A		T	U
T		I		I		A		I	T	O		A		I	A		A		S		P	
I	I	G	A		E	F	I		V	A		T	O	F	A		A	M	O	U	L	U
A		A		P		I		T		L	I	O		E		F		E		A		A
F	O		S	I	U		V	A	A	I		T	O	E	L	A	U			L	U	
A		F		O		M		U			A	O		S		A		F	U	A		A
U	N	A	I		S	A	I	L	E	L	E		T	A	U	T	U	A		U		V
		R		T		T		E		A		L		G		U		A	U	V	A	A
L	U	A	M	A	N	U	V	A	E		S	O	L	O	F	A		V		I		M
O		N		P		A		L		M			O			T	O	A	I	L	O	A
T	A	I	M	U	A		L	E	U	A	T	E	A		S	U		E		E		G
U			A		L		A		L		T		S		A	O		U	L	U	A	
	L	A	U	P	E	P	A		F	I	L	I	V	A	A		O	I		U		L
A		S		U		A		P		E		M		G		T		A	L	A	L	O
F	A	A	V	A	E	I	L	E	A	T	U	A	S	A	M	O	A		A		I	
A		M		V		A		N		O		N		G		M		T	U	A	L	A
	F	O	L	A	U		S	I	L	A	S	I	L	A		A	U		A		I	

A'OGA SAMOA ONLINE

SAMOA ONLINE SCHOOL

O e sa'ilia se tautua
e fesoasoani i le a'oga
a lou alo poo oe fo'i?



SALĀ DR SAILI AUKUSO

MATOU TE OFOINA TAUTUA NEI:

- E lagolago fanau i le atina'e o tomai faavae i le tautala, faitau, tusitusi, malamalama i le gagana Samoa ma le gagana Peretania
- E fesoasoani i soo se tasi o loo fia faalelei ona tomai faavae literasi i gagana e lua
- E fesoasoani i meaa'oga a fanau i le fale pe a tu'ua le a'oga
- E lagolago soo se tasi i le tapenaga o ni pepa mo a'oga, sauni atu i su'ega poo ni fonotaga
- E lagolago polokalame a'oga i mataupu taugagana e lua, ma le silapasi a'oga Samoa—Niu Sila ma Samoa
- E fesoasoani i le atina'e o agavaa ma tomai mana'omia o tusitusiga ma su'esu'ega i le kolisi ma le iunivesite fo'i
- Ma ni isi fo'i ofo lelei mo oe

Fesoota'i mai loa i le

Telefoni: numera 02102567412; 0210364322

Meli: ola.aogasamoasonline.com; saili.niupac@gmail.com

Poo le Upega Tafa'ilagi: A'oga Samoa Online

Mai le tusiupu a Parate

- FA'A'A'ALE, v. to do things expeditiously.
 FA'A'A'ANO, v. Syn. FA'AUIGA.
 FA'A'A'ASA, v. to make red hot.
 FA'AA'E, v. to cause to ascend. Applied to those banished, and to fishermen.
 FĀ'A'AI, s. 1. the forfeit of food paid by the loser of a game. 2. Forced contributions of food given to the mālō.
 FAA'AI, v. to begin to feed an infant.
 FĀ'A'AI, v. to make to fit in, as two pieces of wood. FA'A'AI AIULI. See ' AIULI.
 FA'A'AIGA, v. Syn. FA'AA'A.
 FA'A'AIMAGO, v. to encroach, to claim that which belongs to another, to cheat.
 FA'A'AIMATŪ, v. to have weak eyes from old age or disease.
 FA'AAIVAO, v. to cause to go wild, to drive into the bush, of ani mals.
 FA'A'AO'AO, v. 1. to have a long head ; a disfigurement. 2. To be long and narrow, of a canoe.
 FA'AA'OA'O, v. 1. to imitate, 2. To mimic. Ona fa'aa'oa'o lea ' o le leo o lona tuagane.
 FA'AAOAO, as AOA.
 FA'AA'OA'O, s. a copy, a model.
 FA'AAOAOINA, v. to be left alone, to be shunned. Syn. FA'AAGAGANOAINA.
 FA'AA'OA'OGA, s. mimicry.
 FA'AAOI'A, s. a slight squall.
 FA'AAOGĀ, v. to make of use ; to bring into use.
 FA'A'AU, v. to put a helve to an axe, to make a handle for any thing.
 FA'A'AU'AULO, as 'AU'AULO.
 FA'AAUAUMAMĀINA, v. to be pronounced good, of toga given.
 FA'AAUALELE, v. from AUALELE, to be precipitate.
 FA'AAULIA, v. lit. to make like uli, the good taro being picked out and the uli left ; applied to the leavings of toga, from which the good has been picked out.
 FA'A'AUMEA, v. to associate together; to hold in common.
 FA'A'AUMEAMAMAE, v. to make friends, to be on terms of intimacy.
 FA'AAUTA, v. to ask questions whilst knowing what is proper to be done.
 FA'A'AUTAMA, s. the womb.
 FA'A'AUTU, v. to apply to, as a parable to a particular party.
 FA'A'AFA'AFA, v. to exaggerate.
 FA'A'AFAGA, s. a hank of sinnet. Syn. 'AFATO. ' Olāu fa'a'afaga.
 FA'AAFE, v. 1. to cause to turn aside. 2. To cause to call in, as a travelling party invited into a house.
 FA'AAFI, s. the sheet and tilalalo of a canoe .
 FA'A'AFI, v. 1. to bring down a tame pigeon to its perch by pulling its string. 2. To put down the pola of a house. Syn. TATU'U.
 FA'AAFU, S. the name of a month, February-March. FA'AAFU, v. to lay the firewood ready for lighting. FA'AAFU, v. 1. to search for a yam which is afu. 2. To search for a pedigree.

NIUPAC PUBLICATION

Email: ola-niupac@gmail.com
 Phone: 02102567412
 Facebook: [ola—puletini—a'oga](https://www.facebook.com/ola-puletini-a'oga)
 Website: www.ola888.com

Editor:
 Levi Tavita ~ ltavita8@gmail.com

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA acknowledges and defends the rights of other copyright holders whose material we borrow and acknowledge accordingly.

NIUPAC 2011